

Tujetsch avess plaschair da la pendiculara

■ (rtr) **La pendiculara che maina da Sedrun sin il Culm da Vi en il territori da skis da Mustér, che las Pendicularas Mustér vulan realisar, chatta buna accoglientscha a Tujetsch.** Grond plaschair dal project per la nova pendiculara che avess er ina staziun a mez a Cungiери ha *Marcel Schmid*. El è stà il president da la Pro Cungiери che vuleva salvar avant radund diesch onns la sutgera da Sedrun a Cungiери. «Mes cor ha gia adina battè per Cungiери» e perquai è Marcel Schmid da l'opiniun che sch'ins possa realisar quest project saja da sustegnair quest cun tut las pussaivladads che sajan avant maun. Uschia ponderescha Marcel Schmid era da laschar reviver la cuminanza d'interess Pro Cungiери che aveva passa 400 commembers.

Vischnanca sustegna project

Sustegn datti era da la vischnanca da Tujetsch. Al president communal *Beat Roeschlin* èsi enconuschent ch'il Cungiери è in vegl giavisch dals Tuatschins. Probabel vegnia la vischnanca er a sustegnair il project finanzialmain. La vischnanca sezza stoppia dentant era far ponderaziuns co

nizzegiar quai e tge ch'i vegnia purschi. Las Pendicularas Mustér han numnadain mo planisà da porscher a Cungiери la pussaivladad dad entrar ed extrar da la pendiculara cun la speranza ch'insatgi privat haja l'iniziativa da far insatge a Cungiери. Predestinada fiss l'ustaria ch'è gia a Cungiери e che vegn actualmain duvrada mo privat. Il possessur *André Maissen* è pront da far la discussiun, sch'i dat interessents.

Anc prendi nagina posiziun

L'arena da skis Andermatt-Sedrun n'ha anc betg vuli prender posiziun. Sco il directur *Silvio Schmid* ha ditg ad RTR n'enconuschan els anc betg il project en detagl. Sumegliant èsi era cun las organizaziun d'ambient. Era quellas na vulan betg prender posiziun avant ch'enconuscher ils detags.

Cungiери e sia istorgia

Dapi 2005 na datti betg pli la sutgera da Cungiери. I sa tractava d'ina sutgera dad in ch'è vegnida bajegiada 1956 e vegniva duvrada l'enviern per skiunzs e pli tard per la via da scursalar e la stad per ir a viandar.



Visualisaziun da la lingia da la pendiculara da Sedrun fin Cuolm da Vi cun staziun a mez a Cungiери.